

Calvin Maduro ta opta pa haci operacion na su braza drechi

BALTIMORE- Orioles di Baltimore a pone e lanzador Arubiano, Calvin Maduro, riba e lista di lesionadonan pa 15 dia, mientras cu na mes momento e organizacion a participa pa medio di un comunicado oficial, cu Calvin ta bao opera su elleboog drechi.


E tin un pida wega gekraak mientras cu e tin pida pida weso den e mesun area aki.

E decision aki a tuma lugar na momento cu Orioles a activa e lanzador derecho Jason Johnson, kende tabata riba e lista di lesionadonan desde April 25 cu fractura di un dede.

E informe ta muestra cu Calvin Maduro kende tin record di 2-5 cu un porcentahe di careda limpi permiti di 5.56 e temporada aki, tin problema for di algun dia caba cu su braza cu cual e ta pitcha.

Pa gran parti di e temporada e lanzador a bin ta confrontando dolor den su elleboog y esaki a bin afecta su actuacion caminda finalmente Manager Hargrove a dicidi di mande pa bullpen.

Un control medico Diahuebs ultimo, a bin revela e daño cu tin den e elleboog y mesora a bai



over na analiza e situacion y kico tin cu haci al respectu.

Orioles mes a reuni cu Calvin den fin di siman y a dune dos opcion, cual ta un sosiego di tres siman pa mira si e dolor lo keda reduci, mientras cu e otro opcion ta operacion di e elleboog.

Dado momento gerencia mes a recomenda na Calvin pa haci un operacion despues di a reuni cu e cuerpo medico, y Diasabra ultimo e lanzador di Aruba a tuma e decision di haci e operacion.

Esaki loifica cu Calvin lo tin cu keda entre seis pa ocho siman for di accion pa despues bai over na un proceso di rehabilitacion pa mira con e braza a keda y pa cual periodo lo tuma e decision riba su regreso den e staff di pitcheo di e ekipo.

Bon Dia Aruba ta manda palabranan di forza y pronto recuperacion pa e lanzador Arubiano, cu e confianza cu e lo recupera di e problema aki pa bolbe haci e trabao grandi cu el a bin ta haci pa e ekipo di Orioles.